



INSTRUCCIÓN 1/2016, do 19 de xaneiro, da Secretaría Xeral de Universidades, para iniciar o procedemento de avaliación do rendemento da fase de estadía do persoal investigador contratado polas universidades do Sistema universitario de Galicia (SUG) ao abeiro do Programa de apoio á etapa inicial de formación posdoutoral, modalidade A, do ano 2013.

A Orde do 2 de outubro de 2013 (DOG nº 197 do 15 de outubro de 2013) pola que se establecen as bases para a concesión das axudas de apoio á etapa inicial de formación posdoutoral recolle no artigo 6 do anexo I o procedemento de avaliación do rendemento para a fase de estadía das persoas contratadas con cargo á modalidade A deste programa.

De acordo con este artigo, unha vez transcorridos 21 meses de estadía as universidades beneficiarias terán que remitirle á Secretaría Xeral de Universidades un informe, xunto cunha memoria asinada pola persoa contratada e pola persoa responsable ou coordinadora do grupo de investigación, sobre o grao de cumprimento do plan de estadía. Dado que neste mes se cumpren os 21 meses de estadía para os contratos que comezaron en abril de 2014, cómpre iniciar este procedemento de avaliación do rendemento.

De acordo co Decreto 4/2013, do 10 de xaneiro, polo que se establece a estrutura orgánica da Consellería de Cultura, Educación e Ordenación Universitaria, correspóndelle á Secretaría Xeral de Universidades contribuir á ordenación e complementariedade das capacidades investigadoras do SUG, seguindo criterios de excelencia e consolidación no ámbito dos obxectivos que estableceza o Plan galego de investigación, desenvolvemento e innovación tecnolóxica.

En consecuencia, en uso das competencias que teño atribuídas como secretario xeral de Universidades, dito a seguinte instrución:

1. Iniciar o procedemento que permita a avaliación das persoas investigadoras contratadas no Programa de axudas de apoio á etapa inicial de formación posdoutoral, modalidade A, da convocatoria do ano 2013, que se atopan a piques de rematar o seu período de estadía no estranxeiro, de acordo co procedemento establecido no artigo 6 do anexo I da Orde do 2 de outubro de 2013 (DOG nº 197 do 15 de outubro de 2013).
2. Para tal fin, as universidades beneficiarias deberán remitir, con data límite do 16 de febreiro de 2016, un informe acompañado dunha memoria asinada pola persoa contratada e pola persoa responsable ou coordinadora do grupo de investigación, sobre o grao de cumprimento do plan de estadías, no que



indicará os períodos de estadias efectivamente cumpridos especificando, no seu caso, as modificacións producidas e a súa causa con respecto ao plan de estadias presentado coa solicitude.

3. Con obxecto de coñecer o rendemento científico acadado nesta fase, o informe da universidade e a memoria que o acompaña deberán describir o traballo realizado por cada unha das persoas contratadas así como o grao de adecuación das actividades desenvolvidas ao seu plan de traballo previsto para ese período. No caso de que se produciran modificacións sobre as previsións iniciais deberanse motivar e explicar a súa incidencia no proxecto presentado. A documentación presentarse en formato libre e a memoria deberá ter unha extensión de entre 2.500 e 4.000 palabras

4. Complementariamente, e para verificar o cumprimento do período mínimo de 21 meses esixido na fase de estadia, as universidade beneficiarias deberán remitir á Secretaría Xeral de Universidades, con data límite do 15 de marzo de 2016, un certificado emitido polo centro receptor ou centros receptores no que se indique o período de tempo en que a persoa contratada permaneceu neles.

5. No caso daquelas persoas que iniciaron o contrato con posterioridade ao mes de abril de 2014 ou daquelas que tiveran o cómputo do contrato interrompido por algunha das causas indicadas no artigo 14 da orde de convocatoria, deberá remitirse o informe da universidade e a memoria cunha antelación mínima de 45 días con respecto ao inicio teórico do contrato de retorno, e o certificado emitido polo centro receptor ou centros receptores con 15 días de antelación.

6. O informe, a memoria e a documentación complementaria serán avaliados pola Secretaría Xeral de Universidades, que poderá contar co asesoramento de expertos externos, e será preciso obter unha avaliación positiva e realizar un mínimo de 21 meses de estadia nesta fase para acceder ao contrato na fase de retorno.

Santiago de Compostela, 19 de xaneiro de 2016

O secretario Xeral de Universidades

José Alberto Díez de Castro